

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- कठुआ जिले च होए दे टाकरे च 3 आतंकवादी मारे गे न। इस टाकरे च 3 सुरक्षाकर्मी शहीद होए, 4 कर्मी जख्मी, जेहदे च डीएसपी ते इक पैरा कमांडो शामिल न।
- कैबिनेट नै बजट दी महत्वपूर्ण घोषणाएं दी अमलावरी लेई मंजूरी दित्ती। मुफ्त बिजली, राशन ते पेंशन ते ब्याह-शादिएं च थोने आली सहायता च बाढ़े बारे मशवरा कीता जा'रदा ऐ।
- भारतीय चुनाव आयोग नै नगरोटा ते बड़गाम विधानसभा हल्के लेई विशेष नजरसानी लेई अधिसूचना जारी कीती।
- श्री माता वैष्णो देवी श्राइन बोर्ड चेत्र नराते गी दिक्खदे होई श्रद्धालुएं दे सुआगत लेई तैआर नमें सिरेया तैआर दर्शनी ड्योदी ते अद्धकुवारी थाहर श्रद्धालुएं लेई सुविधाएं च बाढ़ा कीता गेआ।
- उपराज्यपाल मनोज सिन्हा, मुख्यमंत्री, उपमुख्यमंत्री ते होरने दुए नेताएं शब-ए-कदर ते जताम-उल-विदा दे मौके पर सब्बनें गी शुभकामनां दित्तियां।

<><><><><><>

Encounter

कठुआ जिले दे जुथाना दे सुफैन जंगली इलाकें च कल रातीं होए दे टाकरे च त्रऊं आतंकवादिएं गी मारी मकाया गेआ। इस दरान त्रऊं सुरक्षा बलें दे शहीद होने दी बी खबर ऐ। इक डीएसपी ते इक पैरा कमांडो सनें चऊं दुए सुरक्षाकर्मी बी घायल होई गे। घायलें दा इलाज जारी ऐ। टाकरे च एसडीपीओ बार्डर, डीएसपी धीरज कटोच होर बी जख्मी होई गे हे। टाकरे च शहीद होए दे सुरक्षाबलें दी पंछान रियासी दे तारिक अहमद, हीरानगर दे जसवंत सिंह ते नानक चक्क कठुआ दे बलविंदर सिंह दे तौरा पर होई ऐ। एह सब्बे डीएसपी कटोच हुंदे एसपीओ हे। टाकरा कल बडलै शुरू होआ जिसलै सुरक्षाबलें छप्पे दे आतंकवादिएं दे इक समूह गी फगड़ने लेई इक तपाशी अभियान चलाया हा। डीजीपी नलीन प्रभात, आईजीपी जम्मू भीम सेन टूटी, सीआरपीएफ दे आईजी ते होर पलुस ते फौज दे आला अधिकारी इस अभियान दी निगरानी करा'रदे हे। होर ब्योरे गी अजें बलगेआ जा'रदा ऐ।

<><><><><><>

Cabinet Meeting

मुख्यमंत्री उमर अब्दुल्ला हुंदे आस्सेआ 7 मार्च गी बजट भाषण च कीती गेदी मुख्य बजट घोषणाएं गी लागू करने लेई मंत्रिमंडल नै जंदे रोज अपनी मंजूरी देई दित्ती ऐ। आकाशवाणी दे जम्मू संवाददाता नै जानकारी दित्ती ऐ जे मंत्रिमंडल दी बैठक मुख्यमंत्री अब्दुल्ला हुंदी अध्यक्षता च होई। जिस दरान अंतोदय अन्न योजना दे लाभार्थिं गी मुफ्त बिजली ते राशन देने दी घोषणा दे इलावा पेंशन ते ब्याह-शादी लेई रपे-पैहे देने च बाद्धा करने बारे घोषणाएं गी लागू करने दी मंजूरी दित्ती गई। मुख्य बजट घोषणा च प्रधानमंत्री सूर्यधर मुफ्त बिजली योजना तैहत् सब्बने अंत्योदय अन्न योजना दे लाभार्थिं दे घरें लेई 200 यूनिट मुफ्त बिजली ते इस श्रेणी च ओने आले परोआरें दे हर माहनू लेई 10 किलो मुफ्त राशन देना शामिल ऐ।

<><><><><><>

ECI

भारतीय चुनाव आयोग नै 77 लगरोटा ते 27 बड़गाम विधानसभा हल्के लेई विशेष नजरसानी लेई अधिसूचना जारी कीती। क्वालीफाइंग तरीक 1 अप्रैल 2025 तैह कीती ऐ। इत्थें तौले गै उप-चुनां करोआए जाने न। आकाशवाणी जम्मू संवाददाता दी रिपोर्ट मूजब चुनाव आयोग नै मतदान केन्द्रें लेई 4 अप्रैल चुनाव सूचिं दे मसौदे लेई 8 अप्रैल दावे ते एतराज लेई 8 अप्रैल थमां 24 अप्रैल दावे ते एतराज इ नबेड़े लेई 2 मई दा समा तैह कीता। खीरी मतदाता सूचि 5 मई गी प्रकाशित कीती जाग।

<><><><><><>

SMVDSB-Facilities

श्री माता वैष्णो देवी श्राईन बोर्ड नमीं ते बाद्धू ढांचागत सहूलत कन्नै श्रद्धालुएं दे सुआगत लेइ पूरी चाल्ली तैआर ऐ। हफ्ता भर चलने आले नराते 30 मार्च थमां शुरू होआ'रदे न ते 6 अप्रैल गी सम्पन्न होंगन। आकाशवाणी जम्मू संवाददाता दी रिपोर्ट मूजब श्राईन बोर्ड नै श्रद्धालुएं दी सहूलत लेई केई सारी सहूलतें दी घोषणा कीती ऐ तां जे यात्रा पर औने आले श्रद्धालुएं दी यात्रा सुखद ते अरामदायक होई सकै। 15 जहार श्रद्धालुएं लेई अद्धकुवारी थाहर ही मौसम च खड़ोने लेई सुविधा उपलब्ध करोआई गई ऐ। इत्थें श्रद्धालुएं दी सहूलत लेई पानी,, प्रसाद ते होर दुइयां सुविधा उपलब्ध न। नमें सिरेया दर्शनी ड्योढी बी चेत्र नराते दरान श्रद्धालुएं दे सुआगत लेई पूरी चाल्ली तैआर ऐ।

<><><><><><>

Navratras Security

औंदे नरातें दे घ्यार गी दिक्खदे होई श्री माता वैष्णो देवी जी दे आधार शिविर कटरा च सुरक्षा बंदोबस्तें गी होर बी निग्गर बनाया गेआ ऐ। ज्हारां बद्धे श्रद्धालु, मेद ऐ जे इस पवित्र मौके पर इत्थें दर्शन करने लेई ओंगन। प्रशासन नै एह्दे लेई लोड़चदे इंतजाम कीते दे न।

उधमपुर—रियासी रेंज दे डीआईजी रईस मोहम्मद भट्ट होरें भरोसा दोआया ऐ जे सुरक्षा दे सारे लोड़चदे बंदोबस्त कीते गेदे न जेहदे च निगरानी, बाद्दू सुरक्षा बल ते हर औने जाने आली थाहर पर निगरानी कीती जा'रदी ऐ तां जे श्रद्धालुएं गी कुसै बी चाल्ली दी परेशानी पेश नेई आवै।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" च इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Shab-Greetings

उपराज्यपाल मनोज सिन्हा, मुख्मन्त्री उमर अब्दुल्ला, उपमुख्मन्त्री सुरिन्दर चौधरी ते होरने दुए मंत्रिएं प्रदेश दे लोकें गी शब—ए—कदर ते जमात—उल—विदा दे पवित्र मौके पर शुभकामनां दित्तियां न। आकाशवाणी दे जम्मू संवाददाता दी रिपोर्ट मूजब उपराज्यपाल होरें अपने सनेह च लोकें गी शुभकामनां दित्तियां। उनें सब्बने दी नरोई सेहत, खुशी ते खुशहाली दी कामना कीती। अपने सनेह च मुख्मन्त्री होरें शब—ए—कदर ते जमात—उल—विदा दी आध्यात्मिक महत्ता गी उजागर कीता। उपमुख्मन्त्री होरें बी एहदे आध्यात्मिक महत्व गारे गल्ले कीती। ग्रामीण विकास मंत्री जावेद अहमद डार, सेहत मंत्री सकीना इत्तू ते जलशक्ति मंत्री जावेद राणा होरें बी लोकें गी शुभकामनां दित्तियां।

<><><><><><>

Stamp Duty

सरकारै सककै सरबंधिएं जिंदे नै खून दे सरबंध न, लेई गिफ्ट डीड्स राएं संपत्ति मुंतकिल करने पर स्टैंप ड्यूटी माफ करी दित्ता ऐ। आकाशवाणी दे जम्मू संवाददाता दी जानकारी मूजब एह स्टैंप ड्यूटी नजदीकी परोआर दे सदस्यें बश्कार संपत्ति गिफ्ट करने पर लाए जाने आला इक टैक्स ऐ। वित्त मैहकमे आस्सेआ अधिसूचित कीती गेदी ऐ, एह छूट पैहली अप्रैल 2025 थमां लागू होग।

इस अधिसूचना मूजब स्टैंप ड्यूटी आली छूट माता-पिता, भ्राह्म, बैहण, पुत्तर, धीह, दादा-दादी, पोत्रा, पोत्री मझाटै प्रापरटी मुंतकिल करने पर लागू होग। जारी इस हुक्मै मूजब आखेआ गेआ ऐ जे सरकारै नै एह फैसला लोकें दी भलाई बेह्तरी लेई कीता ऐ।

<><><><><><>

Saptarni

मन्ने परमन्ने दियां हिंदी लखारी ते कलाकार रमा पांडे हुंदी नमीं पेशकश कहानिएं दा इक संग्रह सप्तपरनी जारी कीता गेआ। मनै गी महोई लैने आली 7 कहानियें दे संकलन आली इस कताब दा अनावरण अतिरिक्त मुख्य सचिव शांतमनु होरें महिलाएं दे पद्मश्री पदमा सचदेव सरकारी कालेज गांधी नगर च कीता। इस कार्यक्रम च रमा पांडे होरें अपनी कहानी “दरख्त-ए-अजाद हिंद” पेश कीती, जिसी सुनियै दर्शक मंत्रमुग्ध होई गे। इस कहानी च इक बर्जुग महिला ते निमै दे इक दरख्त मझाटै गैहरे आध्यात्मिक ते भाव-भरोचे सरबंधे गी दर्शाया गेआ ऐ।

<><><><><><>

Baoli

शिक्षा सरबंधी अतिरिक्त मुख्य सचिव शांतमनु होरें कल उधमपुर जिले दा व्यापक दौरा लाया। दौरे दरान अतिरिक्त मुख्य सचिव होरें महिलाएं दे सरकारी डिग्री कालेज उधमपुर च इक न्यूज पत्र बाउली दा पैहला संस्करण जारी कीता। इस मौके पर बोलदे होई शांतमनु होरें कालेज गी अपने पैहले न्यूज पत्र दे जारी होने पर बधाई दित्ती। उनें बेहतर मानसिक सेहत जकीनी बनाने लेई शारीरिक गतिविधिएं दे कन्नो कन्नी पढ़ाई लिखाई च बेह्तरी गी संतुलित करने दे महत्व पर लोह पाई। उनें विद्यार्थिएं गी आग्रह कीता जे अपने करियर गी समझदारी कन्नै चुनन।

<><><><><><>

Rajouri-Fit India

फिट इंडिया जतन दे इक हिस्से दे तौर पर राजौरी जिले दे जीडीसी दरहाल च रस्सा कस्सी दा मकाबला आयोजित कीता गेआ। एहूदे विद्यार्थिएं पूरे उत्साह कन्नै हिस्सा लैता। इनें विद्यार्थिएं अपनी छमता ते किट्टे रलियै कम्म करने आले अपने हुनर गी प्रदर्शित कीता। इस मैच गी कशीश ते ओहदी टीम आस्सेआ जित्तेआ गेआ। कार्यक्रम कालेज दे प्रिंसिपल प्रो. जैड.ए.मीर हुंदी दिक्ख रिक्ख च होआ। एहू प्रतियोगिता नां छड़ी मकाबलेबाजी लेई ही सगुआं एहूदे राएं विद्यार्थिएं नंद बी ठोआया ते कन्नो कन्नी फिट इंडिया जतन आली भेठा अपनी वचनबद्धता बी जाहर कीती।

<><><><><><>